

Ala xa masenyi Annabi Yude naxan seɓe

Masenyi nde yi Kitaabui xa fe ra

Annabi Yude nan yi bataaxe seɓe Ala xanuntenyie ma, a findi Kitaabui nan na mixi birin be naxee wama birafe Ala xa seriye fɔxo ra. Na danxaniyatɔe jama, Annabi Yude yi bataaxe seɓexi naxan ma, mixi ndee nu bara so e tagi alako e xa Ala xa xaranyi mafindi e waxonki ra. Na mixi jaaxie jere ki nu bara findi fe xungbe ra na Isayankae be, ndee fa bira e xa wule masenyi fɔxo ra.

Na na a ra, Annabi Yude naxa woyenyi xoxoxe fala e be na xaranyi xa fe ra. A naxa danxaniyatɔe rasi a fanyi ra, e naxa lu seniyentareja kui. A naxa a masen e be a fiixe ra, a na mixi mooli yahannama nan sotoma. Temui dangixi mixi gbegbe naxee nu na Ala xa kira xon ma, e mee ne Ala xa seriye ra, na naxa findi jaxankate xungbe ra e be. Annabi Yude mu tinxu na mooli xa raba na danxaniyatɔe ra.

Won fan xa nu na marasi rame. Mixi gbegbe na dunja naxee Ala xili falama, konɔ e mu Ala xa seriye rabatuma. Alatala Kitaabui luxi won yi ra na nan ma alako won xa masenyi birin sa sikeeli ma, won xa a mato xa a findixi nondi nan na, xa na mu a ra xa Sentane xa wule na a ra. Ala xa won natanga na diinela wule falee ma. Amina.

Ala xa masenyi Annabi Yude naxan seɓe

1

¹ N tan Yude nan yi ki, Ala xa Mixi Sugandixi Isa xa konyi, nun Yaki ngaxakerenma. N na yi bataaxe seɓefe mixie nan ma, Baba Ala naxee xilixi, a naxee xanuxi, nun Ala xa Mixi Sugandixi Isa naxee makantaxi. ² Ala xa kinikini, bojesa, nun xanunteya gbo wo yi.

³ N xanuntenyie, n bara wa bataaxe seɓefe wo ma won ma kisi xa fe ra. N bara wa na rabafe alako n xa wo ralimaniya, wo xa gere so won ma danxaniya xa fe ra, naxan pan bara ge masende kerenyi ra seniyentɔe be. ⁴ Mixi ndee bara so wo tagi, naxee xa jaxankate pan bara seɓe a rakuya. Kaafirie nan e ra, naxee won Marigi Ala xa hinne mafindima, alako e xa lu fe jaaxie kui, e xa e kobe raso won Karamoxo kerenyi ra, won Marigi Isa, Ala xa Mixi Sugandixi.

⁵ Hali wo a kolon, n wama wo ratufe fe dangixi ndee nan ma. Marigi to ge

Isirayila jama raminide Misira bōxi ma, a naxa Isirayilaka danxaniyataree sonto. ⁶ Malekē ndee fan to e yete lu binyetarepa kui, e e xōnyi bepin, Ala naxa e raso geeli kui, e xa lu dimi kui han kiiti xungbe sa lōxōe. ⁷ Sodoma nun Gomora, a nun e rabilinyi, e to e yete rafi fe jaaxie ma, e nun e boore nu kafu mōoli nde ra naxan mu lanma adamadie tagi, Ala naxa e findi misaali ra, a e raso te xōora naxan mu xubenma abadan.

⁸ Kōnō na mixi naxee bara so wo tagi, e laamatunyi ndee toma naxee a niya e xa seniyentarepa raba, e Marigi xa yaamari matandi, e malekē konbi. ⁹ Malekē mange Minkayilu to wōyen Ibulisa be Annabi Munsa fure xa fe ra, Minkayilu mu suusa Ibulisa xa wōyenyi yaabide konbi ra. A a fala ne gbansan, «Ala xa i makiiti.» ¹⁰ Kōnō na mixie konbi tima fe nde xa fe ra, e mu naxan kolon. E naxan kolon e yete ra, a wula sube xaxilitaree daaxi, na fan mu findi sese ra fo e kanase. ¹¹ Naxankate na e be. E bara bira Kabila xa misaali fōxō ra. E bara bira kōbiri fōxō ra alō Balami, e fa lōe. E bara matandi ti alō Kora, e xun fa rakana.

¹² Na mixie bara wo xa ngaxakerenya malanyie manōxō. E e degema wo ya ma, e meenima e yete nan gbansan ma, e mu yaagima. E luxi alō nuxuie, foye naxee raperema, kōnō e mu fama tune ra. E luxi alō sansi naxee mu bogi raminima e bogi temui. E to tala, e bara faxa sanmaya firin. ¹³ E luxi alō baa mōrōnyie naxee xunfe raminima. Na xunfe misaalixi na mixie xa fe jaaxie nan na. E luxi alō tunbui naxee ragataxi koore ma, e nu lintan dimi kui abadan.

¹⁴ Enoki, Adama tolobite solofere nde, naxa yi masenyi fala Ala xili ra e xa fe ra, «Marigi na fafe, a nun a xa seniyentōe wulu wulu, ¹⁵ alako a xa adamadi birin makiiti. Kaafirie xa makiiti e xa fe jaaxi rabaxie ma. Kaafirie xa makiiti e xa konbie xa fe ra, e naxan falama Marigi xun ma.» ¹⁶ Na mixi mōolie luma ne sōnxō ra, e mu jēlexinma, e birama e yete waxōnfe nan tun fōxō ra, e de igbo, e mixi madaxuma wōyenyi jōxunme ra alako e xa se soto.

¹⁷ Kōnō wo tan, n xanuntenyie, wo xa ratu won Marigi Isa xa xēerae xa masenyie ma. ¹⁸ E nu bara a fala wo be, «Waxati dōnxōe, mixie fama ne yode Ala ma, e bira e waxōnfe tinxintaree fōxō ra.» ¹⁹ Na mixi mōolie na wo tagi. E wo xa lanyi kanama ne. E birama e yete xaxili nan fōxō ra. Ala Xaxili Seniyenxi mu na e bōpe i.

²⁰ Kōnō wo tan, n xanuntenyie, wo xa wo xa danxaniya seniyenxi rasabati. Wo xa Ala maxandi a Xaxili Seniyenxi saabui ra. ²¹ Wo xa lu Ala xa xanunteya bun ma, alako wo Marigi Isa, Ala xa Mixi Sugandixi, xa kinikini wo ma, a xa wo rakisi. ²² Wo xa

kinikini mixie ma naxee siikexi, ²³ wo xa e ratanga te ma. Wo man xa kinikini booree fan ma gaaxui kui, kono wo xa meeni wo yete ma e ya ma, alako wo fan naxa fa wo yete findi seniyentaree ra.

²⁴ Ala tantu, naxan noma won nakiside won ma yunubi birin ma, naxan noma won masende seniyenyi nun seewe ra a xa nore kui. ²⁵ Ala tantu, naxan firin nde mu na, naxan bara won nakisi a xa Mixi Sugandixi Isa saabui ra. Nore, xunnakeli, senbe, nun noe na a be beenun dunija xa folo, yakosi, nun waxati naxan sa fama abadan. Amina.